

宮闈典第八十二卷

公主駙馬部彙考二

金

金制公主導從之儀 按金史儀衛志大長公主導從一十二人皇妹皇女一十人並服紫羅繡帽背葵花夾襖盤裏幘頭大佩銀腰帶牙杖各二其諸宗室女各以親疎差降之傘制公主青羅表紫裏金鍍銀浮圖郡主縣主夫人銀浮圖皆青表紫裏

熙宗天眷三年八月壬午初定公主郡縣主駙馬官品 按金史熙宗本紀云云

章宗明昌二年七月庚午諭有司自今外路公主應赴闕其駙馬都尉非奉旨毋擅離職 按金史章宗本紀云云

元

世祖中統二年詔公主駙馬非聞奏不許擅取官物九月丙子諭駙馬凡民間詞訟無得私自斷決皆聽朝廷處置 按元史世祖本紀云云

至元十一年五月丙申以皇女忽都魯揭里迷失下嫁高麗世子王愷 按元史世祖本紀云云

至元十八年二月辛未高麗王王禕以尙主乞改宣命益駙馬二字制曰可 按元史世祖本紀云

云

至元二十年夏四月癸卯授高麗國王王禕征東行中書省左丞相仍駙馬高麗國王 按元史世

祖本紀云云

至元二十四年二月壬子封駙馬昌吉爲寧漢郡王 按元史世祖本紀云云

至元三十一年成宗以初卽位賜駙馬銀有差五月封皇姑爲安平公主 按元史成宗本紀至元

三十一年四月甲午成宗卽位乙巳賜駙馬蠻子帶銀七萬六千五百兩闊里吉思一萬五千四百

五十兩高麗王王暉三萬兩五月戊寅封皇姑高麗王王暉妃忽都魯揭里迷失爲安平公主

成宗元貞元年春正月乙亥封皇姑囊家眞公主爲魯國大長公主駙馬蠻子台爲濟寧王仍賜金

印三月禁陰陽人不得游於駙馬之門 按元史成宗本紀云云

元貞二年詔公主駙馬毋罪官吏中書令請節賜與又詔嚴招戶之禁 按元史成宗本紀元貞二

年春正月乙未詔公主駙馬非奉旨毋罪官吏二月乙亥中書省臣言陛下自御極以來所賜公主駙馬爲數不輕向之所儲散之殆盡今繼請尙多臣等乞甄別貧匱及赴邊者賜之其餘宜悉止從之五月甲申禁公主駙馬招戶

大德元年十一月丙申禁駙馬毋奪民田 按元史成宗本紀云云

大德二年禁公主駙馬受獻及擅招戶擅祀嶽瀆并傳旨付外者罪 按元史成宗本紀大德二年春正月壬辰禁公主駙馬受諸人呈獻公私田地及擅招戶者二月癸未詔駙馬毋擅祀嶽鎮海瀆秋七月壬寅詔駙馬及諸近侍自今奏事不經中書輒傳旨付外者罪之

大德七年禁駙馬擅杖州縣官吏及以奴代征者 按元史成宗本紀大德七年夏五月乙卯禁駙馬毋輒杖州縣官吏違者罪王府官閤五月丁丑禁諸王駙馬等征北諸軍以奴爲代者罪之

大德八年詔禁公主駙馬給驛用人乘傳之制 按元史成宗本紀大德八年春正月辛巳詔妃主有馬者十取其一駙馬往遼東捕海東鶻者毋給驛三月戊辰詔駙馬所分郡邑達魯花赤惟用蒙古人三年依例遷代夏四月丙戌詔駙馬徵索有司非奉旨輒給者罪甲午詔駙馬進捕鷹鷂皆有

定戶自今非鷹師而乘傳冒進者罪之冬十月丁亥詔駙馬母乘驛以獵

大德十年封駙馬爲王賜金印

按元史成宗本紀大德十年春正月丁卯命駙馬妃主奏請錢穀

者與中書議行之五月乙酉封駙馬脫鐵木而爲濮陽王賜以金印公主忙哥台爲鄆國大長公主

大德十一年五月武宗卽位申駙馬給驛乘傳之禁并不許方士日者遊於駙馬之門

按元史武

宗本紀大德十一年夏五月武宗卽位六月壬子封皇妹祥哥剌吉爲魯國大長公主駙馬瑯阿不
刺爲魯王秋七月丙寅命諸王駙馬入覲者非奉旨不許給驛十月乙巳勅方士日者毋遊諸王駙
馬之門十二月丁巳勅公主駙馬使臣給璽書驛券不許輒用圓符乘驛

武宗至大二年春正月庚寅禁日者方士出入公主之門三月己亥封公主阿剌的納八刺爲趙國
公主駙馬注安爲趙王 按元史武宗本紀云云

至大四年三月仁宗卽位十一月戊午禁漢人回回術者出入諸王駙馬家

按元史仁宗本紀云

云

仁宗皇慶元年四月丙子封鄆國大長公主忙哥台爲大長公主賜金印

按元史仁宗本紀云云

順帝至元元年十二月丙辰制省公主駙馬飲膳之費 按元史順帝本紀云云

至元二年夏四月戊寅封駙馬孛羅帖木兒爲毓德王六月丁丑禁駙馬從衛服只孫衣繫條環

按元史順帝本紀云云

至元五年秋七月丁丑封皇姊月魯公主爲昌國大長公主 按元史順帝本紀云云

至正七年三月命有司定弔賻公主駙馬禮儀之數 按元史順帝本紀云云

明

太祖洪武九年以李祺尙皇長女因定公主册立儀 按大政紀洪武九年九月癸丑以韓國公李

善長子祺爲駙馬都尉尙皇長女臨安公主 按明會典公主册立儀洪武九年定先期內使監

陳設册案於乾清宮御座之東南設儀仗於丹陛之東西陳女樂於丹陛之南尙儀奏外辦上皮弁

服中宮翟衣陞御座樂作陞座訖樂止引禮引捧册使者女官就殿上拜位贊拜樂作四拜樂止傳

制官稱有制贊捧册使者跪傳制制曰今册長女爲某公主命尙宮正某行禮舉册官以册立授使

者使者受册以授執事者執事者跪受退立於殿東贊興捧册使者興贊拜樂作四拜畢樂止執事

者捧冊前行使者隨詣華蓋殿設香案於正中設冊案於香案前公主服九翟四鳳冠翟衣立於殿西東向冊使至以冊置於案冊使立於冊案之東南向引禮引公主詣拜位贊禮贊公主四拜畢贊禮請公主詣前冊使稱有制贊禮贊公主跪贊宣冊宣冊官取冊立宣訖以冊入於盤贊受冊宣冊官以冊授公主公主受冊興以冊置於案執事者收冊冊使興引禮就導引公主詣上前謝恩贊八拜又詣中宮前謝恩贊八拜禮畢次見皇妃東宮及妃各王及妃如常儀公主授以金冊壻皆稱駙馬都尉賜誥命皇姑曰大長公主皇姊妹曰長公主皇女曰公主

自公主以上
俱授金冊

洪武十一年十一月乙卯以梅殷爲駙馬都尉尙第二皇女寧國公主 按大政紀云云

洪武十七年九月辛丑命公侯駙馬凡大朝會及常朝許由午門之右門出入其有宣召及不時奏事仍由左右掖門十一月壬申以牛誠爲駙馬都尉尙第三皇女宗寧公主 按大政紀云云

洪武二十年十月壬子詔公侯駙馬出使其僕從及諸藩府使人無符驗者不許擅乘驛傳船馬違者罪之 按大政紀云云

洪武二十六年定公主下嫁之禮 按明會典公主婚禮洪武二十六年定

謁廟 受冊次日引禮引公主謁奉先殿用香燭

公主受醺戒 其日早公主具禮服辭奉先殿申時內官陳設儀仗於正宮內丹陛之東西大樂

設於丹墀執事女官備金爵酒壺果盒以俟內贊女官二員列於殿之東西皇帝常服皇后燕居服

陞座公主具禮服引禮女官引詣皇帝前贊拜樂作四拜興樂止贊跪贊受爵女官以爵斟酒立授

公主公主受酒飲訖以虛爵授執事者執事者跪受退復位贊恭聽戒命隨意訓戒公主聽受訖贊興贊

復位贊拜樂作四拜興樂止引禮女官又引詣皇后前贊拜樂作四拜興樂止贊跪贊受爵執事女

官斟酒立授公主公主受酒飲訖以虛爵授執事者執事者跪受退復位贊恭聽戒命隨意訓戒公主聽

受訖贊興贊復位贊拜樂作四拜興樂止禮畢公主易燕居冠服命婦送至宮門引禮引公主由宮

門東門出過宮門西上陞輦至右門內公主降輦駙馬揭簾公主陞轎內使備儀仗鼓樂前導合女

樂三十六人接引至府公侯百官命婦送至府各回家

駙馬受醺戒 其日早駙馬父與駙馬具家用祭服告祠堂畢至午後駙馬父坐於正堂駙馬具

見尊長服引禮引駙馬至拜位贊鞠躬兩拜興平身贊跪贊搢笏贊受爵執事者斟酒授駙馬駙馬

受酒飲訖以爵授執事者贊聽訓戒駙馬父隨意致戒辭駙馬聽訖贊出笏俯伏興贊復位贊鞠躬兩拜興平身禮畢駙馬便服上馬行親迎禮若駙馬父母俱存則父母同坐於正堂行禮如前儀

親迎 其日駙馬受醺戒訖具儀從鼓樂前導至午門西下馬至朝房具朝服候申時序班二人具服引駙馬由午門西角門入至右紅門內官二員具服接引駙馬至內使監前候報公主醺戒將畢引駙馬至右門西東向立公主至駙馬揭簾公主陞轎駙馬先由午門西角門出至上馬處上馬先至府候公主至揭簾公主降轎同謁祠堂

謁祠堂

執事者先於祠堂設祭物畢引禮女使引駙馬及公主至祠堂拜位駙馬立於東公主

立於西贊禮贊鞠躬拜駙馬公主皆兩拜引禮引駙馬詣高祖考妣神位前公主仍立於拜位贊跪駙馬跪公主亦跪贊搢笏駙馬搢笏贊進爵執事者以爵跪進於駙馬右贊受爵駙馬受爵以授執事者贊獻爵執事者以爵奠於高祖考神位前贊再進爵執事者以爵進贊受爵駙馬受爵以授執事者贊獻爵執事者以爵奠於高祖妣神位前贊出笏俯伏興公主亦興引禮又引駙馬詣曾祖考妣祖考妣各神位前如前儀訖贊詣讀祝位駙馬至讀祝位贊跪駙馬跪公主亦跪讀祝訖俯伏興

公主亦興贊復拜位贊拜駙馬公主俱兩拜禮畢導還府行合盞禮

合盞

其日女使陳設駙馬座於室東西向公主座於室西東向各設拜位於座之南設酒案於

室中稍南置兩盞兩盞卽葫蘆盞於案上饌案二於室中贊引二人導駙馬二人導公主就拜位贊兩拜駙馬公主相向皆兩拜請就位駙馬公主各就位執事者奉饌案置於駙馬公主前執事者二人以二盞斟酒以進駙馬公主皆飲酒執事者進饌駙馬公主皆舉箸執事者再斟酒駙馬公主皆飲酒執事者再進饌駙馬公主皆舉箸執事者以兩盞盞斟酒合和以進駙馬公主皆飲訖執事者又進饌駙馬公主皆舉箸執事者徹饌案贊駙馬公主興就拜位駙馬公主相向皆兩拜禮畢見舅姑 公主見舅姑舅姑坐於東西向公主立於西東向行四拜禮舅姑答兩拜

賜駙馬冠帶衣服

紗帽一金帶一後以玉帶紵絲羅衣各一襲斜皮靴一雙鞍馬二

選擇駙馬

累朝定例凡遇公主長成當擇婚配聖旨下禮部榜諭在京官員軍民人等有子弟

年若干歲或十五十六或十四臨時定容貌齊整行止端莊父母有家教者許於部報名赴內府選擇本部先將報到子弟揀選請旨命司禮監於諸王館會選如初選不中或再行五城訪報或差司

官於順天等八府或行山東河南會同巡按御史選擇到日赴館會選如初選中三人送春曹作養仍題請吉日赴御前欽定一人爲駙馬陪選二人送本處儒學充廩挨貢其與選不中者先年或准充附萬曆八年俱不准十三年准分別地方遠近行順天府給賞

洪武二十七年令給儀賓品級誥命特優靖江王府儀賓祿秩之典 按明會典凡儀賓婚配洪武二十七年令郡縣主之夫都與宗人府儀賓職事散官還照品級俱授誥命靖江王府女封郡君壻之祿秩比從四品一般與儀賓職事

惠宗建文元年二月進封江都郡主爲公主以儀賓耿璫爲駙馬都尉 按大政紀云云

成祖永樂元年以儀賓袁容李讓宋瑛俱爲駙馬都尉尋封爲列侯 按大政紀永樂元年正月乙丑以儀賓袁容李讓宋瑛俱爲駙馬都尉五月甲申封駙馬都尉袁容爲廣平侯李讓爲富陽侯容讓俱有守城功羣臣以爲言故封之

仁宗洪熙元年正月丙子駙馬都尉西寧侯宋琥以罪削爵命駙馬都尉宋瑛襲封 按大政紀云

云

宣宗宣德三年詔擇端重儒者教習駙馬并定儀賓品秩 按明會典宣德三年詔駙馬不務詩書通古今曉忠孝仁義之道必至怠惰驕縱何以保富貴須使之親近儒生先朝駙馬家有學錄可擇端重儒者一人命之教習正統以後凡駙馬初授者俱令赴監習禮讀書祭酒一依學規教之不率者奏聞 又按宣德三年定郡主儀賓秩從二品縣主儀賓從三品郡君儀賓從四品縣君儀賓從五品鄉君儀賓從六品若遇行禮序於同等官員之左

英宗正統九年令各王府如有孀居郡縣主君親王量撥老成內使看守門戶 按明會典云云
憲宗成化十年勅初授駙馬送國子監讀書習禮 按大政紀成化十年勅公侯伯并駙馬初襲授者送國子監讀書習禮祭酒一依學規教之懶惰不律者奏聞

成化十一年令駙馬凡年二十五以下者俱送監讀書 按明會典云云

孝宗弘治 年令王府慎選儀賓卽以本府長史教授 按明會典弘治間令王府選擇儀賓務要年及十五歲以上人物長成俊秀者方許具奏成婚又令各王府子女不許於本府軍校之家選配又議准各王府選中儀賓本府長史教授俱要通送本處提學撥發讀書習禮不時考驗年至三十

方止

弘治六年詔駙馬讀兵書及五倫等書 按明會典弘治六年奏准駙馬將兵家諸書及五倫等書每季送祭酒司業處每日兼授二本各定起止令在家誦讀季終赴監驗試如果讀熟而大義或未通曉卽與講解又復授書還家誦讀季終考驗如初必至三十歲方免拘束

弘治十五年命駙馬家訓導月送功課到監考校 按明會典弘治十五年奏准駙馬家教書訓導按月備將功課送監考校九年到部行查違者究治

弘治十六年令儀賓不得回還侍親 按明會典弘治十六年令儀賓因郡縣主故求回還侍親者不准止許照天順年例移親侍養

世宗嘉靖六年令國子監博士禮部主事各一員在駙馬府教習 按明會典嘉靖六年令於國子監博士等官或附近教官內選有學者一員專在駙馬府教習經書禮部以時稽校教有成效奏薦擢用尋題准陞授禮部主事職銜教習 又按嘉靖六年令吏部會同禮部查照先朝勳戚之家訓導教書事例於國子監博士助教等官或見在部及附近教官內推選行止端莊年力英銳文學

優長義理精明者一員在駙馬府教讀經書習字使知忠孝仁義之訓及通曉禮樂名物古今事類庶幾德器有成仍聽禮部堂上官提調稽考教書官三年六年考滿若教有成效不拘年分奏薦擢用自後遇選駙馬本部移咨吏部推陞禮部主事一員專在駙馬府教習

嘉靖二十四年議各府儀賓按期赴府畫押 按明會典嘉靖二十四年議准各府儀賓務要照將軍等例五日一赴府畫押或不到即時差人查究下落其有無故推託者聽親王量加罰治若累次抗違不到備由參奏前來以憑題請處治搆訟緣事者將俸糧按月扣留在官作正支銷

嘉靖三十四年議准儀賓續親 按明會典嘉靖三十四年議准選到儀賓有未婚而郡縣主君病故要將次女續親者仍聽准改給誥命

嘉靖四十四年議准儀賓出親郡王者照舊赴京餘免 按明會典嘉靖四十四年議准選中儀賓除出親郡王者照舊赴京外鎮國將軍以下儀賓及各中尉宗壻俱免其赴京年終類奏其儀賓誥命祿米從人照例題給

神宗萬曆七年議儀賓祭典及住支常俸 按明會典萬曆七年議准親郡王儀賓例給祭典外其

餘悉從裁革凡主君夫亡而乏子嗣可依者照舊贍給若有子嗣夫亡及儀賓於主君亡日卽住支常俸不許虛冒

萬曆十年議選中儀賓免其赴京謝恩因定奏請格式及恩卹之典 按明會典萬曆十年議准親

郡王及將軍之女選中儀賓俱免赴京謝恩選有之日長史教授等官申呈撫按衙門詳允就便冠

帶成婚各於年終具本類奏

萬曆七年例

如所選儀賓有未成婚而病故者許另選婚配

嘉靖四十四年例

其儀

賓成婚之後各王府照例請給誥命祿米從人該布政司仍具結到部以憑題覆奏請期限照男選婚女請封例如過期十年以下查題十五年以下行勘十五年以上立案

奏請格式

某王臣某謹奏爲乞恩請給誥命祿米事據某郡王某等啟稱本王長子長孫鎮輔

奉國將軍某嫡庶第幾女某縣主郡縣鄉君等會選到某府州縣某籍某人嫡長次男某等例該請

給誥命祿米從人等項乞爲轉奏等因具啟到臣查得宗藩要例內儀賓婚配一款親郡王及將軍

之女選中儀賓俱免赴京謝恩選有之日長史教授等官申呈撫按衙門詳允就便冠帶成婚各王

府照例請給誥命祿米從人該布政司仍具結到部以憑題覆等因今據某縣主郡縣鄉君選配子

弟某等已令長史教授某查勘明白申呈撫按衙門詳允就便冠帶成婚訖例該請給誥命祿米從人理合按季開列類奏伏乞勅下禮部照例將某縣主郡縣鄉君選配子弟某等授以縣主郡縣鄉君儀賓職事賜給誥命祿米從人等項臣等不勝感戴天恩之至爲此具本專差校尉某齎捧謹具奏聞計開某郡王府一某王長子長孫鎮輔奉國將軍某嫡庶第幾女某縣主郡縣鄉君見年若干歲妃夫淑人某氏於某年月日嫡生如係庶出者云第幾妾某氏於某年月日庶生於某年月日具奏請封選婚於某年月日奉禮部某字幾號勘合會選到某府州縣某籍某人嫡長次男某見年若干歲先於某年月日申呈撫按衙門詳允就便冠帶成婚訖

凡儀賓恩卹萬曆十年議准儀賓

祿米因於郡縣主君丁憂仍全給至妻亡之後截日住支若儀賓先故不分有無子嗣郡縣主君等亦止半給養贍誥命仍許請給其儀賓身後卹典一槩停免至於中尉之女聽從選配不必請授宗女宗壻名色亦不給與婚嫁之資長史教授等官將選配子弟開報巡撫衙門徑行給劄冠帶成婚量免本身雜泛差役仍聽自便不必在府朝參如有志舉業不願冠帶者聽其與民生一體考選應

舉出仕

萬曆七年例

熹宗天啟五年選駙馬尙公主 按明通紀天啟五年七月選駙馬劉有福尙六公主齊贊元尙七公主有福十五歲八月十五午時生父劉宗正母鄭氏齊贊元十四歲十一月二十六日子時生父齊歌凱

皇清

崇德元年

大清會典崇德元年公主等冊封儀冊封諸公主禮是日內院捧冊置龍亭內陳設於

崇政殿請

旨授封持

節官前導次龍亭次冊封官行至公主府門公主率侍從婦女迎出儀門之東向西立設黃案一於府門前冊封官自龍亭捧置黃案上由儀門入設於堂前幄內設

節案於冊案之南冊封官於

節案之東向西立公主隨入於